

Книгаен тодматскон

# Шуд — кытконо вал өвөл

**Йоскалык библиотекаын «Улон — питыран, сюзэм — пияла... Одыг удмурт кышномуртлэн даурьем улон сюресэз» книгаен (18+) тодматскон ортчиз.**


Та книгаен авторез — Кияса ёросысь Виль Тйгырмен гуртысь 30 ар чоже дышетисын ужам нылкышно Мария Никонова. Мария Павловна ачиз но та уждадын вал. Мон та удмурт кышномуртлы, сое песая шуэм уг поты, синмаськыса быри. Куараез жингрес, визьмыз лэчыт, йырсазыз зол, нош солы туэ 98 арес, пе, тырмоз ини.

М. Никоновалэсь дневникёссэ, кызы ачиз Мария Павловна шуэ — нуналъянзэ, книгае люказ но поттыны дасяз гуртоез, тодосчи Николай Анисимов. Бичет потйз Эстониын. Филология наукаосья кандидат, Эстониысь литературной музейысь наукая валтись ужась Николай Анисимов верамъя, та книгаен удмурт фольклористика понна дунлыкез туж бадзым, малы ке шуоно асьмеос дневникёс гожъяны дышемын өвөл. Нош татын 30 ар чоже Мария Павловна гожъя, кызы солэн нуналыз ортче, кыче куазь вал, кыче иворъёс семьяяз но гуртын, кёня сылэ сиён-юон но трос мукетсэ...

— Книга поттыны шуыса гожьям арбери ой вал со, — шуэ Мария Никонова. — Малпай, кулэме бере нылпиосы лыдзозы но улэм-вылэме сярис тодозы. Мон та дневникме лушкем гожъяй ук, огзылы но ой вера. Кудзы ке корка пыро ке, ватиско вал. Анисимов Колялы дневникёсме возматй но, со печатлано кариськиз. Али малпасько, оло, сётоно но вылымтэ, отчы семьяе сярис тросгес гожъяй бере. Мон 30 ар школаын покчи классёсты дышетй. 30-тй мае дышетскон йылпумъяське ке, 1-тй июне колхозэ ужаны потиськом вал



Кияса ёросысь Виль Тйгырмен гуртысь 97 аресъем Мария Никоновалэн книгаез потйз, отчы шедизы 30 ар чоже улэм-вылэме сярис гожьямёсыз.



УдГУ-ысь Удмурт кылошбурья, финно-угроведения но журналистика институтлэн кивалтисез Галина Глухова верамъя, туалала фольклористикаын таңе книгаос туж кулэ.

— шутэтскон нунальёстэк тыршимы. Ма, ваньзэ ой ке но вера, яралоз, дыр.

УдГУ-ысь Удмурт кылошбурья, финно-угроведения но журналистика институтлэн кивалтисез Галина Глухова нырысь ик кёня ке вераз Николай Анисимов сярис. Туала егит тодосчиос тросгес пуко кабинетёсын, утчасько архив

документёсысь, книгаосысь, нош Николай Владимирович ачиз гуртысь гуртэ ветлэ, материал люкаса. Со вашкалазэ сяна, туннэ фольклорез но утыны тыршис тодосчи.

— Та книга нырысетйез луэ, кудиз туалала фольклористикалы сйземын. Таңе гожтосёсты утчаны-шедьтыны но кулэ. Котькуд пырись

муртлы адыми аслэстыз дневникёссэ уз возматы, малпанёссэ уз усъты. Книгаен огья пуштросэзья мар вераме потэ? Та огшоры кёсыт гожтэмёс өвөл. Татын гуртысь удмурт кышномуртлэн быдэс улонэз адзиське. Паймытэ соиз но: Мария Павловналэн пинал дырыз туж секыт орчемын. Но со огпол но уг жождиськи

улон-вылонэз вылэ, — шуэ Галина Анатольевна.

Зэмзэ но, Мария Никоновалэн книгаез туж тунсыко но огкутскемен лыдзиське. Огшоры учырёсты но автор, зэмос писатель кадъ, калык веранёсын но фактёсын полэстыса гожтэ, асёныз ачиз вераське улон-вылон, шумпотон-куректон сярис. Туж тунсыко шуд сярис малпанёсыз. Мария Павловна шуэ: шуд — кытконо вал өвөл.

Книгалэн 2-тй люкетаз люкамын калык кырзанёс но, аслаз Мария Павловналэн малпамёсыз но. Кияса ёросысь сям-йылольёсты ортчыгтыян, сюан но мукет праздникёсты сйзем кырзанёс пыртэмын. Бордазы ик сётэмын нотаосыз — соосты дасяз Историяя, кыгы но литературая Удмурт институтысь наукая ужась, этнокрезьгурчи Ирина Пчеловодова.

— Концертэн ветлыку, шулдыр вал улон, — веранзэ азылантэ Мария Павловна. — 20 ар мында гуртысь ансамблями кырзай. Туж трос вашкала кырзанёсты дышетй, солдат келян-пумитан, ныл сётон гурёсты но быдэсьямы. Грузовой машиналэн кузовез сцена луэ вал. Пёртэм конкурсьёсын вормылым, колхоз орган но кузьмаз вал.

Вераны кулэ: Мария Павловна али но трос кырзанёсты тодэ, али но органэн но домбраен шудэ. Сое нокин юри өз дышеты крезьгуро инструментёсын шудыны, ас понназ дышиз.

Мария Никоновалэн книгаез сярис вераськонкешонэз вашкала удмурт кырзанёсын шулдыртызы тодмо удмурт усточиос Юлия Павлова, Катерина Кензали, Николай Анисимов, Ирина Пчеловодова, Ольга Перевозчикова но Кияса ёросысь «Тйгырмен кенакёс» ансамбль.

Галина СЕМЁНОВА



**История, кыгы но литературая Удмурт институтысь наукая ужась, этнокрезьгурчи Ирина Пчеловодова:**

— Та книгаез лыдзиса, Мария Никоновалэсь улон сюресэ тодэм сяна, адзыны быгатиськом удмурт кырзанлэсь азылантиськемзэ. Тодискомы, кыче со вашкала зэмос кырзан. Куке та кырзанёслы нотаос гожъян борды басьтиськи, тужгес секыт потйз йыр-пыд сётон гур. Солэн расицифровкаез бордын туж кема пуки. Малпасько, кыче усточиос выльллям вашкала удмуртёсмы — ми али озы кырзаны ум быгатиське.



**История, кыгы но литературая Удмурт институтысь но Эстониысь Литературной музейысь наукая ужась, фольклорист Николай Анисимов:**

— Бадзым тау шуэме потэ Мария Павловна Никоновалы удмурт калыкы со быдэ кузьым лэстэмез понна. Книгае ваньмыз өз пыры — куд-ог малпанёс аслад гинэ сюлмад кылыны кулэ, дыр. Мария Павловна ваньзэ туж быгатыса гожтэ. Палэнын улыкуд, дор пальёсысьтыд интыос, адымиос сярис лыдзиса, бертам кадъ потэ.